

31
EXAMEN SCRIPTI

De

J U R E

EXEQUENDI SENTEN-
TIAS DIRECTORIBUS CIR-
CULORUM COMPETENTE

CONTRA

DISSERTATIONEM



De

OFFICIO DIRECTORUM
ET DUCUM CIRCULARIUM
IN EXECUTIONE SENTENTIA-
RUM EDITI.

M. DC. XCIX.

32

THE

EXHIBITION
OF
THE
COMMISSION

OF THE

OFFICE OF THE
DIRECTOR
OF THE
EXHIBITION

AND



Prolegomena.



On unò tantum spiculorum genere Dissertatio, quæ de Directorum Ducumque Circularium officiò in executionibus sententiarum non ita pridem prodiit, sed tribus diversorum scriptorum arietibus impetita fuit. Theses, quibus audacior quidam, non tam solidè, quàm insulsè proprio ausu primus adversus eam in publicum prorumpere conatus est, jacent variis, quibus inflatæ sunt, & quæ a prudentioribus nunquàm approbabuntur, calumniolis inculpationibus in S. Cæs. Majestatem ejusque Excelsum Consilium Aulicum ac Ablegatum Illustrissimum magis in hypothesi, quàm in Dissertationis autorem vibratis prostitutæ, ut longè lateque ostendent, fabricatorem earum magis pœnam, quàm refutationem meritum esse. Hanc æquus Lector, quod falsas inculpationes attinet, in binis Epistolis Germanicò idiomate editis invenire poterit. Reliqua, quæ pro defensione dissertationis contra speciosiores objectiones in medium adducenda sunt, in hòc examine, & in discussione alterius scripti Germanici contra dissertationem quasi pro assertione jurium Directoriis circularibus attributorum editi, abundè continentur. Magis eruditum & thesibus minis aculeatum scriptiõis genus est, quod post illas vir moderatior contra dictam dissertationem

tionem non in concinnò typò publicavit , cujus proinde stylus cum minùs ferox , minùsque imprudens sit , minùs etiam carpendum opus in modò scribendi reddidit , in Imperatorem quidem ac supremam ejus auctoritatem alicubi etiam minùs æquus , reverentiortamen passim , & variis in locis egregiarum veritatum , quæ contra mastiges Cæsareorum jurium pro Imperatore stant , sine fucò observantior. Fundamentum autem cui juxta octo Positiones præliminares auctori opus suum superstruere placuit , in eò consistit , quod jus exequendi Directoribus Circulorum non solum per leges , sed etiam pactò publicò inter Imperatorem & Electores Principes ac Statùs ita datum sit , ut non liceat sententiàs supremorum judiciorum per alios exequi , sed si vel ipse Imperator illis non adhibitis ad executionem sententiæ in Consiliò aulicò lata progredieretur , posse eos etiam vi armatà resistere , & jus suum in executione sententiarum quæsitum tueri. Autor Dissertationis rem tanti momenti profundius examinandam censuit : Et dum exactiùs Contenta istius scripti consideravit , ac de iis cum viris hujusmodi negotiorum peritissimis communicavit , cum ipsis etiam in eo deprehendit , planè intacta relicta , imò pro alienis & ad propositum impertinentibus habita fuisse , quæ tamen ad decisionem quæstionis plurimum conferunt , & in diversitatibus Consilii Imperialis aulici & Judicii Cameralis consistunt.

Author Scripti eas superficiariè tangit ad caput 2. fateturq; Consilium aulicum antiquius esse Judiciò Camerali , & à Solò Imperatore constitui ac formari , licèt ibiquædam addat , quæ cum rei veritate non conveniunt , de quibus suò locò. Fateor ibidem Consilium aulicum quoad formalia breviorè processu gaudere. Fatetur ad c. 4. Executorem rem ab aliò judicatam impedire non debere. Fatetur ad c. 8. Imperatori quondam liberam exequendi facultatem competiisse , concedit ad c. 13. in modo publicandi sententias aliquid arbitrio Cæsareo relictum esse. Fatetur etiam ad cap. 5. extra dubium supremam judi-

judicandi potestatem Imperatori competere, eique Jus exequendi sententias conjunctum esse. Cæterum facultatem istam judicandi Imperatores exercuerunt vel ipsi, vel per Judicem & Judicium, sive Consilium aulicum, antequam Judicium Camerale institueretur, quod auctor ad Annum 1495. refert, quod Imperator Maximilianus I. in Comitibus Wormatiensibus illi Judicio primas Leges dedit, & Judicium Camerale fixum & stabile fecit, ac in ordinem redegit. Ante sub ipsius Parente Imperatore Friderico ad aliquod tempus & ad quasdam causas, imò jam tum sub Wenceslao pro conservanda pace publicâ Judicium habitum fuisse, quod Camerale vocabatur, ex Historiâ notum est.

Imperator Maximilianus I. Judicium Camerale ordinarium instituturus, ut illud Ordines agnoscerent, ejus Jurisdictioni se submitterent, & sumptus ad ejus sustentationem conferrent, opus habuit, ut eorum consensum adhiberet.

Ordinationes etiam, quæ in judicando & exequendo observandæ essent, tanquam Leges ipsorum consensu & consilio fiebant. At Imperator hoc ipso Jurisdictione suâ se non abdicavit, sed concurrentiam Consilio aulico cum Judicio Camerali reservavit, imò nonnullas causas Judicio Camerali decidendas non communicavit, sed Consilium aulicum separatas à Judicio Camerali rationes semper retinuit, nec Legibus Cameralibus præcisè adstrictum fuit, & antiquum modum procedendi continuavit. Imperatores à tempore Ferdinandi I. consilio isti aulico à se dependenti Ordinationes peculiares dederunt, quorum postrema Divi Ferdinandi III. S. Cæs. & Regis Romanorum Majestati in Capitulationibus tanquam usu recepta proposita est, inevidens indicium, quod Ordinatio Cameralis Consilium aulicum non ita, ut Judicium Camerale etiam post Instrumentum Pacis stringat, quemadmodum vicissim Judicium Camerale Ordinationem Consilii aulici pro norma non habet.

In Instrumento Pacis Cæsareo-Svecico, art. V. §. 55. sancitum quidem legitur, Ordinationem Cameræ Imperialis etiam in Consilio aulico per omnia quoad processum observandam esse: sed notissimus usus & secuta Ordinatio Consilii aulici id ad substantialia Processûs restrinxit, sine quibus Jus & Justitia ritè administrata dici nequit, nec ad accidentalialia, aut quævis solennia extendit, quod author ad caput 4. & 13. etiam fatetur, & ad cap. 22. inter utrumque Judicium supremum in modo procedendi tantum differentiæ superesse prætendit, ut Revisionis remedio in Camerali Judicio interposito effectum suspensivum denegat, in Consilio aulico autem quæsito (licet contra observantiam) obtrudat.

Extat integer Tractatus de differentiis Consilii aulici & Judicii Cameralis, & qui in utroque Judicio versati sunt, in omnibus penè à capite ad calcem usque formam Processuum hic & illuc discrepare nòrunt, earumque ratio inde desumitur, quod S. Cæs. Majestas secundùm verba authoris ad cap. 5. tanquàm fons & origo Jurisdictionis juxtà Consilium aulicum consentientibus Ordinibus Judicium Camerale sub præscripto certo modo procedendi instituit. Ipse Imperator autem ad eundem modum in Consilio aulico præcisè observandum se non obstrinxit, sed supremam Jurisdictionem suam retinuit illibatam, ut Consilium aulicum, per quod eam exercet, prorsus æquali Jure cum Judicio Camerali censeri non possit.

Lubet ex multis Consilii aulici & Judicii Cameralis differentiis unam delibare, quæ proximè ad præsentem controversiam accedit, nimirum Commissionum, quales ad formandum totum processum & referendum cum, vel sine voto Judicii Camerali instituere non licet, quod tamen Imperatori integrum est, ità, ut ab ipsius Majestate solà Commissarii etiam ad Austrægas, non item à Judicio Camerali dari possint.

Vigore hujus potestatis Soli Imperatori relictae, ipsi quoque integrum mansit, ad totum processum, qui executionem etiam complectitur, Commissarios constituere, etiam partes

partes executorias alicui , quem maximè idoneum reputat, committere, neque ità ad Circulos adstrictus est instar Judicii Cameralis, cui exequendi facultas limitata quoad modum & personas adhibendas concessa fuit, quæ antea cum totâ Jurisdictione sola penès Imperatores fuit, cum Circuli , eorumque Directores & Duces initium nondum habuissent,

Imperatores Judicium Camerale eâ intentione non instituerunt, nec continuârunt, ut sese potestate aut Jurisdictione suâ per illud exuerent , aut quasi iisdem Cancellis se inclinassent , quos Judicio Camerali cum Ordinum consensu ponendos duxerunt, sed ipsis Electoribus , Principibus & Statibus , personis etiam privatis commodum & pergratum fuit, hujusmodi Commissionum ope celebriorem Justitiæ administrationem obtinere , & si hic modus maturandi litis exitum tolleretur, piorum Imperatorum laudabili zelo expeditius administrandi Justitiæ obex poneretur, & partes maximo Beneficio abbreviandi lites privarentur , quod propter imaginarium quoddam commodum privatum sine gravi injuria universis adimi non posset, nec quisquam ex Electoribus , Principibus, vel Statibus facillè deprehenditur , qui non vel hujusmodi Commissiones petierit, vel acceptaverit.

Ab initio penès Imperatores mansit, sententias in Judicio Camerali latas exequi, quod ejus nomine & ipso absente per ejus Vicarium, vel per Imperii Regimen fiebat , ut legitur in *Declar. pac. publ. de Anno 1500. art. 7. & 9. Receß. Imp. Aug. de Anno 1500 art. 38. & 39. Ord. Cam. Constantiens, de Anno 1507. art. 17. In Rec. Imp. Trevir. & Colon. de Anno 1512. part. 1. §. 8. & 9.* executio sententiarum Cameralium demùm Capitaneis Circulorum commissa fuit.

Juxtà Ordinationem Cameralem contumaces in Bannum priùs declarabantur, ut habet *Ord. Cam. de Anno 1500. art. 8. de Anno 1507. art. 16. & de Anno 1555. part. 3. tit. 48.* Postquam passim sunt, se in Bannum declarari, instar hostium judicatorum tractabantur, quorum persecutio Circulis commissa fuit , ità
tamen

tamen, ut etiam per ipsum Imperatorem, ope etiam Regimenti, vel per quemvis Magistratum, imò per alias etiam personas privatas executio realis contra huiusmodi contumacem fieri potuerit, ut habet *Ord. Cameral. Wormat. de Anno 1521. tit. 31. §. 7. Declar. pac. publ. de Anno 1522. cap. 14. 21. 24. 30. §. 31.*

Ne fortè diversum ratione Imperatoris etiam in bonis immediatè Imperio subiectis obtinere videri possit, his addendum, quemadmodum Imperator in *Rec. Imp. de Anno 1548. §. 37.* promisit, se Electoribus, Principibus & Statibus Imperii pro exigente necessitate in executione sententiarum Cameralium adstiturum esse: ità etiam in *Ordinatione Camerali par. 3. tit. 48. §. 9.* parti victrici liberum relinqui, an Ducem Circuli, an verò Imperatorem ipsum pro impetrandà executione implorare velit. Si etiam causæ adsint, ob quas Directores vel Duces Circulorum ad executionem adhibendi non essent, Iudicium Camerale ad eos tam adstrictum non est, ut non proximo Circulo ejusvè Duci executio tunc mandari, etsi in proximis Circulis idem obstaculum occurrat, ac remotiores & tandem ad ipsum Imperatorem veniri possit, ut habet *Ord. Cam. par. 3. tit. 49. §. 7. §. pax publ. Aug. de Anno 1548. §. 18.* Neque verò hæc ambages necessariæ essent, si statim constaret, executionem non nisi à Cæs. Majestate cum effectu obtineri posse *d. tit. 48. §. 9.*

Sed & in ipsa Executione gradus observantur, quos dissertatio per vim directivam & compulsivam significavit. Iudicio etiam Camerali juxtà ejus Ordinationem *par. 3. tit. 43. §. 3. §. tit. 48. §. 1. §. 5.* datum est non solum per Comminationes & dictationes poenarum, ut & declarationem in Bannum, sed etiam per missionem in possessionem, ut victor eam occupare possit, sententias suas sine Circulorum ope exequi, tenenturque Electores, Principes & Status ità immixtum nullò modò turbare, sed eum potius in possessione suà defendere. Debuisset itaque Lex vel Constitutio ad confutandam dissertationem allegari, quæ omnem exequendi facultatem à S. Cæs. Maje-

Majestate ad Circulorum Directores abdicativè translata esse probaret, in quo opposita sententia unicè fundatur. Cum autem ad cap. 8. author fateatur, quondam Imperatori liberam exequendi facultatem competiisse, probari etiam debuisset, quando & quomodo hæc facultas ad Directoria Circulorum restricta fuerit.

Interim obstat ipsi vulgatum Brocardicum : quod non mutatum est, cur stare prohibetur ? Idem author non vult ad cap. 14. Imperatorem ad novum modum exequendi adstringi. Declaratio *Pac. pub. de Anno 1522. §. 30. Et pax publ. de Anno 1548. art. 28.* alias Ordinationes aliæque Jura executiones concernentibus pro non sublati haberi jubent.

Sanâ ratione non licet præsumere, Imperatorem hoc Jure se abdicasse, aut manûs sibi ligare voluisse, quò minùs aliis etiam executiones sententiarum, quàm Circulorum Directoribus ampliùs committere possit, quamvis etiam causæ adsint, ob quas prætereundi essent.

Et cum omnium reliquorum Principum & Statuum maximè inter sit, ne ipsis libertas petendi & suscipiendi hujusmodi commissiones intervertatur, nec executiones Directoriis Circulorum privativè subjiciantur : Quis credet, eos huic opimo Juri suo hoc ipsò recunciâsse, quod Recessui Imperii novissimo §. 15. 86. Et 160. insertum legatur, executionem sententiarum Cameralium Directoribus Circulorum committendam esse. At de reliquis usq; eò excludendis, ut non ampliùs ab Imperatore impetrare liceat, executionem sententiarum in Consilio aulico latarum ipsis, vel alii idoneo committi, dictò Recessu nihil continetur : quin potius §. 168. Consilio aulico speciatim ab Imperatore injunctum fuit, ut primas Instantias æquè ac Judicium Camerale observaret. Si eadem parificatio utriusque Judicii quoad executionem sententiarum placuisset, de quibus in præcedentibus paragraphis actum, id ibidem vel alibi verbis clavis expressum, aut generaliter ad sententias supremorum Judiciorum accommodatum fuisset,

quicquid speciatim de sententiarum Cameralium executione dispositum est. His accedit observantia non interrupta, quam exempla plerarumq; Executionum per Consilium aulicum aliis præter Circularum Directores commissarum testantur, quæ tam copiosa & in Consilio aulico, nec non in aulis & Curiis Principum & Statuum versatis nimium cognita sunt, ut non opus sit, pauca ex tam multis recensere.

Contrariæ sententiæ Patroni non concederent, ipsos Directores Circularum hujusmodi Commissiones ad exequendum sententias Consilii aulici ab Imperatore nec petere, nec suscipere potuisse, cum Executiones sententiarum Cameralium iisdem verbis Circularum Ducibus commissæ fuerunt.

Vix credendum, authorem ipsum alicui ex Directoribus Circularum litem in alio Circulo habenti suasurum esse, si sententiam immissoriam à Cæs. Majestate eodem modò obtineret, ne possessionem ope alterius Commissarii Cæsarei ingrederetur, sed prius istius Circuli Directores adeundos censeret. Cur ergò tantò cum impetu impugnatur, quod in casu inverso non illicitum reputaretur? Et sic ex fundamento prorsus nullo pro Jure noviter Directoribus Circularum quæsitò contra Dissertationem in cassum laboratum fuit.

Cum isto fundamento simul caderent, quæ ei superstructa sunt. Sed quia in positionibus & oppositionibus nonnulla etiam continentur, quæ dilucidatione adhuc opus habent, ne quid falsis impressionibus inde concipiendis reliquum maneat, lubet etiam, singula capita ventilare.

Ad Positionem I. & II.

His ita præmissis, positio prima & secunda, quibus probari intenditur, executionem sententiarum à supremis Judiciis aliis committi posse, intelligendæ sunt de facultate officiali, non de Jure supremo exequendi, & de concessione communicativè non abdicativè factâ. Jus exequendi sententias à suprema

prema Jurisdidictione inseparabile est, & propterea ab ea facultatem exequendi non privative, sed cumulative, ut radium à sole emanasse intelligitur.

Ad Positionem III.

Applicatio præmissarum ad Directores & Duces Circulorum ita intelligenda est, ut Leges allegatæ necessitatem per eos exequendi ipsis quidem propter officium injungant, sed non Imperatori. Loquuntur speciatim de sententiis Cameralibus, nec abrogant consuetudines Consilii aulici, neque obstant, quò minus ob justas causas Directoria Circulorum in exequendo præteriri possint. Ex parte 3. tit. 48. *Ord. Camer.* constat, male intelligi titulum sequentem 49. quasi Imperator pro executione adimplenda non aliter implorari possit, quam si Circuli illam prius denegassent.

In Instrumento Pacis *art. 16.* Directoribus Circulorum alii etiam Commissarii Cæsarei adjecti sunt.

§. 15. *Recess. Imp. de Anno 1654.* agit de speciali executione Collectarum ad sustentationem Judicii Cameralis destinatarum.

Et quamvis §. 160. Directoribus Circulorum executiones sententiarum in genere committat, non tamen Ordinatio Cameralis & Consuetudines Consilii aulici hòc ipsò sublatae sunt, quin potius ibi pro regula istius Commissionis Ordinatio Cameralis expresse allegatur & subjungitur; Directores Circulares ob causas fonticas etiam à Judicio Camerali in exequendo præteriri posse.

Ad Positionem IV.

Positio quarta à Legibus ad Pacta transit, de quibus non est Disputatio, quin Judicio Camerali Jurisdictio per omnes partes, simulque executio certis conditionibus & modis ab Imperatore cum consensu Ordinum data, & de iis inter Cæs.

Majestatem & Ordines ita conventum fuerit : At quod Con-
ventiones istæ usque eò se non extendant , ut nulla omninò
executio, nisi præ requisitis Directoribus vel Ducibus Circu-
lorum fieri possit , supra satis evidenter demonstratum, con-
trarium autem in positionibus, minimè evictum est.

Allegata Declaratio Pacis publicæ *Norib. de Anno 1522.*
§. 14. 21. 24. 30. & 31. non vult, ut aliæ Ordinationes circa exe-
cutiones per Constitutionem Ducum Circularium immutatae
intelligantur, quod repetitur in Pace publica *August. de Anno*
1548. §. 28. id etiam de consuetudinibus in Consilio aulico
receptis accipere par est.

Recessus Imperii *de Anno 1544. §. 13.* nihil ad rem facit,
quia de convocandis tum Circulis loquitur. Locus ex Re-
cessu Imperii *August. de Anno 1548. §. 37.* patrocinator po-
tius dissertationi, quia in fine expressè continetur, quod Im-
perator juxta in casibus, ubi necessitas id requirit, Electo-
ribus, Principibus & Statibus promotione & ope suâ adesse,
& pro conditione causarum partes suas interponere velit &
& teneatur. *§. 8. tit. 48. par. 3. Ord. Camer.* jungi debuisset *§. 9.*
ubi partis victricis arbitrio relictum est, pro ulteriore execu-
tione S. Cæs. Majestatem implorare, quod pro dissertatione
militat. Reliqui textus Dissertationi oppositi nihil evincunt,
nisi quod Imperator & Ordines de his, quæ in ipsis Constitu-
tionibus continentur, inter se convenerint. Sed quia in iis
non legitur, executionem Directoribus vel Ducibus Circulo-
rum privativè datam fuisse, nihil etiam Dissertationi obstant.

Art. 16. Instrumenti Pacis jam ad positionem tertiam re-
sponsum.

His ita positis non potest dici, S. Cæs. Majestatem Capitu-
lationi contravenire, dum executionem sententiæ more rece-
ptò fieri curat, quamvis etiam promiserit, se nihil contra Ordina-
tionem executionis directè, vel indirectè indulturam esse :
nam Ordinatio executionis potissimum conservationem pa-
cis publicæ inculcat. Alterum, quod executionem sententia-

rum attinet, in *Rec. Imp. de Anno 1555. §. 71.* paucis exprimitur, & ad Ordinationem Cameralem remittitur : Cui ut & Legibus executionis, aliisvè non contravenitur, si executio sententiarum aulicarum, verbi gratiâ per missionem in possessionem, & aliâs etiam sine Directoribus Circularum peragatur, aut aliis etiam committatur id, quod ex antedictis satis clarum est.

Intentio Capitulationis est, præcavere, ne auxilium in utroq; Ordinationis Capite sistatur : quod promptiore executione non fit. In Ordinatione executionis agitur de sententiis Cameralibus, non de aulicis, quæ tuo usitato modo exequendi relictæ sunt, ibique subintelligitur exceptio, nisi Directoria vel Duces Circularum ob justas causas recusari possint.

Ad Positionem V.

Hic inñſcentur termini ex Jure antiquo Romanorum quæſiti, qui ad Statum Imperii modernum non benè quadrant. Distant inter se vigore officii & vigore Dominiî, aut Imperii ſupremi, Jurisdictionalia exercere. Illô priore modô exequendi facultatem ad Directores & Duces Circularum pertinere, ipſi authori indubitatum eſt. Facultas iſta ratione Imperatoris & Imperii non avtocratica, ſed ſubordinata eſt, ut exerceri poſſit, præviâ ſententiâ & requiſitione opus habet. Mandata executorialia aliâs ab excitatoriis diſtinguuntur ; hæc demum emanant, ſi illis non ſatisfactum ſit. In Ediçto Executionis *de Anno 1648.* nec non in literis ad Directores Circularum, quæ exhibentur in *R. Imp. de Anno 1654.* expreſſè continetur, ipſis ut & Ducibus Circularum facultatem exequendi à S. Cæſ. Majeſtate committi. Quanquàm non negandum ſit, hanc ipſis ut Commiſſionem perpetuam competere ; tamen non ſequitur, eam absq; requiſitione, aut contra ſententias exerceri poſſe, aut Imperatorem Mandata vel Reſcripta ſua executorialia ratione ſententiarum in Conſilio aulico latarum non niſi ad Directores Circularum emittere poſſe, etiam ſi cauſæ a deſſent, cur recusari deberent, quod author poſitionum probare debuiffet, ſed non potuit.

Ad Positionem VI.

Positio sexta incongruè æquiparat Jurisdictionem Statuum cum facultate exequendi Directoribus Jure Officii commissâ, quia in hoc non ita ab Imperatore consensus fuit, ut sese executionibus sententiarum, tam aulicarum, quàm Cameralium planè abdicaret, sed ut ad reservata in ante allegatis Sanctionibus Jura consuetudinaria & Scripta simul respiceretur.

Nullâ autem Lege vel ratione probari potest, officium exequendi Directoribus liberum esse, quod etiam positio 8. negat; sed ratione obsequii erga Imperatorem & quoad Executionis incumbentiam utique necessarium est, quod ut observent, in Declaratione Pacis publicæ *Norib. de Anno 1522. art. ult.* sub gravi pœna mille marcarum auri ipsis injunctum est, & à Judicio Camerali etiam Mandata pœnalia contra eos emanant, ut exequendi officio satisfaciant.

Ex art. 26. Capitulationis Leopoldinæ non sequitur, quia Imperator non debet executionem sententiarum Cameralium impedire: ergo licet Directoribus Circulorum Consilii aulici sententijs resistere. Si verò Ordinatio Executionis facultatem executricem præcisè ad Directoria Circulorum adstrinxisset; utique *art. 38.* Capitulationis contra Dissertationem allegari, quod Rescripta, quibus executio sententiæ ab Imperatore non præcisè Directoribus Circuli, sed alii committitur, locum habere non possint. At contrarium ex suprâ dictis constat. Locus pro insigni allegatus ex Recessu Executionis *de Anno 1650. §. 6.* huc planè non pertinet, quia hic non de ista Executione speciali agitur.

Satis constat à Judicio Camerali ad Imperatorem in materia Jurisdictionis non procedere argumentationem, proinde non sequitur: si Camerale Judicium executiones Circulorum impedire non potest, quod propterea Imperator executionem sententiarum aulicarum aliis non possit, quàm Circulorum Directoribus committere, quanquam urgentes etiam rationes idem velint.

Ad

Ad Positionem VII.

Positione septimâ continentur, quæ altiore indaginem requirunt, nimirum an & quando Ordinationibus liceat Imperatori vi armatâ resistere.

Ex Instrumento Pacis *art. 8. §. 2.* constat, Electores, Principes & Status ne fœdera quidem contra Imperatorem pro conservatione Jurium suorum pangere posse, sed ea semper salvò per omnia sacramentò, quò quisque Imperatori & Imperio obstrictus est, intelligi debere, quò ad obsequium S. Cæs. Majestati præstandum tenentur. Idemque in ipsa Ordinatione executionis contentâ in *R. l. August. de Anno 1555. §. 59.* Ducibus Circularibus expressè inculcatur.

In Instrumento Pacis *art. 17. §. 7.* nulli omninò Statuum permissum est, Jus suum vi, vel armis persequi, sed si quid controversiæ inciderit, unusquisque Jure experiri tenetur, secus faciens reus sit fractæ pacis, quòd in *Recess. Imp. de Anno 1654. §. 193.* repetitum legitur. Positio autem Directores Circularum sub prætextu defendendi Jura sua ad arma contra Imperatorem concitat; & tamen præensum Jus prorsus illiquidum & planè novum esset, ut Imperator viâ facti processisse culpandus esset, si id egit, quod moribus comprobatum, nec scriptis Legibus Imperii disconvenit.

Ubi Jura Imperatoris & Ordinum collidi videntur, non statim cessat respectus & observantia erga Imperatorem, imò ubi inter partes contentio de aliquo Jure vel expeditione occurrit, præventioni locus datur, & occupantis conditio melior habetur, meritoque esse debet, quò minùs pro prævento vis ad ejiciendum occupantem adhiberi debeat.

In Declaratione Pacis publicæ *Norib. de Anno 1522. art. 29.* quem locum sequens positio 8. allegat, expressè sancitur, quomodo hujusmodi controversiæ super executione emergentes decidi debeant, nimirum res ad Imperatorem protinùs deferen-

deferenda, & ab eo Ordinatio & decisio expectanda, eique Circulis acquiescendum statuitur. Cui Sanctioni plus tribuendum, quàm longè à disparatis quæsitis ratiocinationibus. Quod Imperatori fortè regerendum videtur, ipsius Majestatem hic in propria causa versari, adeoque Judicem agere non posse: hoc idem tantò magis Directoribus Circulorum obstarret, qui tamen Imperatorem, ut superiorem venerari, & omnia ipsi in bonam partem vertere tenentur, qui non nudus Judex, sed supremum Caput & Rex est, cui sine gravissimo periculo arma opponi nequeant. Commissiones Cæsareæ autem ad exequendum consuetudine, nec non Imperii Sanctionibus munitæ ad eā minimè referendæ sunt, quæ pro nullis haberi deberent.

Quæ Statibus inter se pro furium suorum defensione licet, ea in maximè dubiis etiam erga Imperatorem usurpare non decet, Imperatoris Officialibus fortè excedentibus, at ipsi Imperatori resisti posse, ex allegatis Legibus Codicis probari posset. Si hoc sub prætextu cujusvis læsionis permitteretur, vix quidquàm tranquillè amplius decideret.

In materia exequendi sententias, plura coincidunt, quorum maximè principale est sententia, quam executio, ut accessorium. Cavendum autem, ne per accessorium subvertatur principale, & ne sententia, quæ ab Imperatore lata est, incompetenti censuræ, vel per indirectum subjiciatur, & planè elusoria reddatur. Nullitates autem sententiæ supremorum Judiciorum impingere, inconveniens est, si manifestè non constet, contra substantialia Judiciorum actum fuisse. Quia à turbis abhorrendum, si parti victæ aliâ insuper viâ consuli potest (potest autem in petitorio, si possessio interim alii adjudicata sit) semitam Juris vi armatæ præferendam esse, quilibet censebit, cui tranquillitas publicæ curæ cordique est. Ex exigua expectatione alterius sententiæ nihil decedit saluti Imperii, ita liceat verba Authoris ad Caput II. huc accommodare.

Author ad Caput I. asserit, hanc controversiam ad Comitiam pertinere : At quâ ratione interim Directoribus Circulorum persuaderi potest, quod justa hîc causa subsit, lite indecisâ contra S. Cæs. Majestatem arma capeffendi?

Ad Caput 26. fatetur, Circulorum non esse, Leges reformare, esse tamen illorum, de justitia non ritè administrata querelas ad Comitiam deferre, & ejus emendationem urgere, quod ad caput 2. Electori Moguntino tribuit, de quibus alibi agendum, hîc autem tantum monendum, rectè silere ibi authorem de armis Imperatori opponendis. Et si hæc quæstio in Comitiiis proponeretur, Directores non haberent, quod sibi decisionem favorabiliorem inde promittere possent, cum majora vota reliquorum Electorum, Principum & Statuum potius pro libertate pristina impetrandi & acceptandi à S. Cæs. Majestate hujusmodi Commissiones irrestrictas salvandâ concordatura essent.

Nec superest quidquam, quod metui oporteret, ne quis sub ista libertate magis, quam per Circulorum Directores gravari posset, postquam Declarationi in Bannum modus positus est, quæ quondam executionem passis querendi materiam præbuit. At ex *Instr. Pac. art. V. §. 56.* constat, remissionem causarum ad Comitiam locum non habere, etiam ubi dubia occurrunt circa interpretationem Constitutionum & Recessuum Imperii, nisi ubi Catholicorum & Augustanæ Confessioni addictorum vota in partes abeunt, & ubi causa inter diversæ religionis partes versatur, quod utrumque deficit.

Ad Positionem VIII.

Contenta hujus Positionis utique Majestati Imperatoriæ multum detraherent, si ipsa non aliter sententias suas exequi posset, nisi Directores Circulorum, quamvis se minimè proclives pro victore demonstrarent. Hâc ratione executiones sententiarum multis difficultatibus involverentur, &

partes cum Iudice cursum Justitiæ sæpe retardatum lugere cogerentur. Positio ipsa hîc adducit locum *ex Ord. Cam. par. 3. tit. 49. §. 7.* quò probatur, Imperatorem posse de executionibus sententiarum etiam Cameralium prospicere, ubi constat, Directores Circularum eas non esse expedituros. Vult positio etiam casu, quò Directores vel Duces Circuli recusari possent, Imperatorem tamen ipsum non posse ad executionem admitti, sed teneri, eam propioribus Circulis intactam relinquere : Hîc de Jure tertii exciperetur, qui se liti non immiscuit. Si propiorum Circularum Directores executioni se non accingendos ducunt, an propterea Directores vel Duces, qui ob demonstratum erga alteram partem affectum executioni non erant adhibendi, Jus acquirant eam intervertendi, si ab ipso Imperatore facta sit, hoc fuisset probandum, sed manebit paradoxum omni Juris colore destitutum.

Quia assertiones dissertationi oppositæ lubricò stant talò, malè ab obsequii vinculo propterea liberati censentur, qui eas pro irrefragabilibus habent, si Imperator iis non ducit accedendum esse. Superest, ut examinentur etiam, quæ author ad singula dissertationis Capita monuit.

Ad Caput I.

Author Dissertationis non opus habuit, ut falsam causam operilicito, in quo versabatur, prætexeret vel veram dissimularet. Ad istum paucorum dierum laborem nec mentem, nec manum propriò motu applicasset; finem, qui ipsi affingitur, nec mente concepit, nec calamo expressit, sed penitralibus terminis inhæsit, quos Imperii Constitutiones supeditârunt, ut nec Imperatoris, nec Directorum circularium Jura vel nimis restringendò, vel extendendò confunderet. Quibus addendum, quod author controversiæ principalis decisionem Comitii sine fundamento tribuat, de quo supra ad Positionem 7. actum.

Ad Caput II.

Contradici meretur non alium exequendi modum Imperatori reliquum esse præter illum, qui in Ordinatione Camerali & novissimo Recellu Imperii præscriptus est, quod in Prolegomenis refutatum legitur. Authori videtur hic Judicium Camerale pro digniore haberi, quàm Consilium aulicum, huic tamen honorem antiquitatis relinquit, nec docet, quando aut quomodo & à quo recentius illud Judicium suprà hoc antiquius Consilium evectum sit. Utrique sua amplissima constat dignitas, sed in Consilio aulico plura negotia publica Belli & Pacis, nec non feudalia, aliaque tractari notum est, quæ Judicio Camerali non sunt commissa: Hinc illud Consilii, hoc Judicii nomine venit, & Consilium aulicum ut plurimum Judicio Camerali præponitur, ut videre licet in *Recess. Imp. de Anno 1654. §. 180. ac Instr. Pac. art. 3. §. 2; art. 5. §. 56. art. 8. §. 5.* & æque non modò supremum Judicium, sed etiam Celsissimum Consilium Imperii est, cujus dignitatem potius auget, quàm minuit, quod ab Electore Moguntino, tanquam Imperii Archi-Cancellariò visitetur, qui tamen in judicando ipsi Legem non dat. Assessores Judicii Cameralis ad munus Consiliariorum Imperialium aulicorum promoveri, nec vice versà hos officium Assessoris Cameralis capeffere constat. Comites & Dynastæ Imperii ex antiquissimis familiis spartam Consilarii Imperialis aulici frequenter ornant.

Ad Caput III.

Omnia, quæ hîc supponuntur, Consilio aulico abs re imputari, quasi ad executionem sententiæ nimis properasset, in Epistolis amici ad amicum solidissimè remonstratum est. Neque verò sub tam piò & justò æquè ac prudente Imperatore verum periculum metui potest, quod armis avertendum esset, cum vel in Petitorio recursus ad Judiciũ salvus adhuc sit: non

autem ad arma veniendum est iis, quos Imperator Jurisdictione suâ compescere potest. Videndum potius, an prætensum præjudicium reverà tale sit, cui alia medela non posset applicari, an pro clandestinis machinationibus Jure merito habenda sint, quæ pro tranquillè administrandâ Justitiâ inter difficultates aliàs metuendas expeditissima videbantur, quæ prudentiæ, non fraudi Judicis religiosi tribuenda sunt. Probè dispiciendum quoque, ne sub prætextu hujus vel illius solennitatis non observatæ, de qua, quod substantialis sit, non liquet, sententia in se justa, simulque ordo in republica impugnetur, qui supremorum Judiciorum sententias extraordinariæ censuræ partium subjici non patitur. Et denique iterum atque iterum æquâ mentis lance ponderandum, nùm quis fortè sibi vel amico in opinione de Justitia causæ nimium blandiatur, & an remedia adæquata ritè & tempestivè adhibita fuerint.

Ad Caput IV.

QUæ hîc objiuntur, facilè resolvi possunt, primò si facultas autocratica, sive Jus supremum ab officio, sive à potestate subordinata exequendi discernitur.

Illa prior à suprema Jurisdictione inseparabilis est, & consistit in dirigendo & ordinando Executionem, hæc autem in ea effectui mancipandâ, & ab illa tanquàm à suo committente & superiore dependet, separationemque ab ea recipit, sed non talum, ut ejus potestatem omninò exhauriat. Ita author etiam ad caput 9. infrâ ratiocinatur, & ad cap. 21. relinquit Imperatori supremam vim directivam in exequendo. Secundò, si ex præliminaribus repetitur, *R. I. de Anno 1654. §. 160.* agere de executionibus sententiarum Cameralium, idem per omnia non obtinere in sententiis Consilii aulici, neque executio statim dici potest clandestina, quamvis irrequisitis Circulorum Directoribus facta sit, quorum devotio & observantia erga Imperatorem major est, quàm ut ad violenta properandum censeant,

ant, ubi benignissimo Capiti suo, quando se gravari putant, placidè conquerendi Libertatem habent; cum spe, S. ipsius Majestatem pro summo Justitiæ amore & studio non permisuram esse, ut Juribus eorum quidquam derogetur, sed ea ipsis ultrò facta testata conservaturam, etsi reverà violata essent, restauraturam esse, quemadmodum de ipsis quoque fiducia est, eos Jura Majestatis Imperatoriæ cum debito respectu agnituros & ilibata relicturos esse: modò Jura Imperatoris & Directorum inter se ritè discernantur.

Ad Caput V.

Modum & rationem exequendi hinc author retulit, quomodo in sententiis Cameralibus procedendum. Aliud obtinere in sententiarum aulicarum executionibus suprà in præliminaribus abundè deductum. Quando præteriditur, ut ab isto exequendi modo recedatur, tunc habet Imperator, quod ei insistat, ut ad celerem Justitiæ administrationem conducenti, nec patiatur supremo Juri suo derogari. Juxta distinctionem ad præcedens caput annotatam falsum non est, quod Majestas Imperatoris salva esse non possit, si Jus supremum exequendi ipsi non competeret.

Ad Caput VI.

Cum Directoria Circulorum ad sententiarum executiones non Jure Autocraticò, sed vigore officii, nec proprio motu, sed ad Mandatum vel requisitionem concurrant, partes eorum subsidiariæ absque injuriâ dicuntur, nec facultatem examinandi etiam sententiam involvunt. Cum Executio certas personas requirat, per quas expedienda est: Locò Circulorum, Ducibus eorum commissa fuit in *Ord. Cam. par. 3. tit. 48. §. 49.* ad quam tanquam ad regulam in ipso *§. 160. R. I. de Anno 1654.* adhuc provocatur, ubi de Executione Directoribus Cir-

lorum mandandâ agitur , inevidens argumentum officium exequendi sententias Ducibus non planè ademptum fuisse.

Etsi vel maximè sententiarum Cameralium executio ad Directores Circularum translata esset, hoc tamen non feriret sententias in Consilio aulico latas.

In novissimo *Recess. Imp. §. 178.* injunctum est Circularis, ut de Officiis Circularis Ducis ejusque Adjunctorum sine mora prospiciant, quod non convenit cum eo, quod penes Directores stet, an ipsi Ducis Officiò fungi velint, & tamen Ducem non à Directoribus, sed ab omnibus Statibus Circularibus dependere, ipse author recognovit, qui alibi etiam non id, quod fit, sed quod fieri debet, valere vult.

Ad Caput VII.

SI in aprico esset, executionem sententiæ per alios ea intentione quæri, ut Directoribus Circularum præjudicium crearetur, haberent, de quo debito modo conqueri possent. At si more recepto executio instituitur, non potest ea pro illegitima haberi, quamvis sententia in Consilio aulico non ad formam aliàs frequentiore videatur promulgata esse.

Effugium quasi in *§. 178. R. I.* novissimi Officium Ducis Circularis denuò confirmatum fuisset, tantum ut contra violatores Pacis publicæ, non autem ad executionem sententiarum se exercere intelligatur, lubrico stat pede. Nemo inficias ire potest, conservationem Pacis publicæ, unde universi Circuli salus dependet, longè majoris momenti esse, quàm executionem alicujus sententiæ, quæ singulos, & ut plurimum privatos actores concernunt. Si itaque Duces Circularum à principali non intelliguntur dimissi, cur idem non esset dicendum de altera connexa functione exequendi sententias minùs principali? Reliquæ objectionis hòc unò solvuntur, quod disposita de executione sententiarum Cameralium non pertineant ad executiones sententiarum in Consilio aulico latarum. Sic etiam cadit, quicquid de violatione Capitulationis & nullitatis vitiò interfectum est.

A S. Cæs. Majestatis indefesso studio & zelo administrandi justitiam prorsus aliena est præsumtio, quasi ipsa non satis de modo exequendi in causa, ad quam alluditur, informata fuisset, cum ipsa sententiam ad effectum promoveri jussit, & antequam tale quid contra Imperii Principem fieri permittat, exactam rei cognitionem hauriat.

Ad Caput VIII.

Oportuit utique Dissertationem meminisse originis Circulorum, ut & Ducum, dum eorum officia in exequendo describere voluit. Inde enim cognosci potuit, executiones sententiarum ante eorum institutionem sub initium seculi 16ti natam, ab Imperatoribus solis, ut reliqua Jurisdictionalia dependisse. Eodem etiam tempore Directores Circulorum officia sua exercere cepisse, verisimile est. Nimis facilis est author annotationum oppositarum; elargiendô mutationem antiquorum Jurium sine ullius expressæ Sanctionis derogatoriæ allegatione, contra *Declar. Pac. publ. de Anno 1522. §. 31.* quam tamen hic adducit, & contra *art. Pac. publ. Cæs. de Anno 1548. §. 28.* interpretandô etiam, & extendendô Constitutiones sententiis Cameralibus speciatim aptatas ad aulicas; insuper habitô, quod usus continuus aliud comprobet.

Negat quidem dissertatio, nec sine rationibus, quas opposita annotatio non aggressa est, ab initio Circulis Capitaneos non fuisse necessarios, neque ullibi legi, tales constitutos fuisse, quod ipse author fatetur, dum Directores Circulorum Ducibus antiquiores esse statuit, sed non negavit, eos facultatem exequendi simul nactos fuisse, cum ad militaria Circulorum negotia expedienda à Circulis constituerentur.

Ad Caput IX.

Unô i&tu resolvuntur, quæcunque hic obijciuntur, primô si Consilii aulici sententiæ, earumque executio à Cameralibus

bus separantur : nam objectiones spectant tantum ad Judicium Camerale : Consilii aulici diversa ratio in prolegomenis deducta est.

Secundò, si executionis gradus distinguuntur, an vis armata adhibenda, an verò missio in possessionem decernenda sit.

Ad hanc ne quidem in Judicio Camerali vel Directores vel Duces Circulorum adhibere, necesse est, ut ex jam dictis abundè constat.

Ad Caput X.

EX *art. 16. Instr. Pac. Cæs. Svec.* malè concludi, quod Directores Circulorum eò tantum casu præteriri possint, quando in propria causa versantur, ex §. 160. *R. l. de Anno 1654.* constat, ubi etiam quævis alia causa fontica admittitur. In *art. 16.* modò allegatò sermo est de eò casu, quò vicinorum Circulorum Directores vel Duces munus exequendi statim suscipere potuerunt & debuerunt. In §. 3. *dicti articuli 16.* optioni restituendorum relictum fuit, an locò Directorum & Ducum circularium alios Commissarios à S. Cæsaria Majestate impetrare voluerint. Discernendum hîc venit jus exequendi per Commissarios, à facultate eos nominandi. Hæc partibus : Illud Imperatori competit, cui etiam Electio unius ex iis, quos partes nominârunt, eorumque confirmatio, quin & nominatio ipsa reservata fuit, quoties pars in iis nominandis tardaverit. Et in Edicto Executorio Pacis Westphalicæ potestas exequendi ab Imperatore conferri dicitur. Sed & parti Victrici licitum est, Commissarios ad sententiarum in Consilio aulico latarum executionem nominare. Jus autem confirmandi potius esse Jure nominandi, vel ex juribus Episcopi & Patroni constat.

Nimis generaliter hîc negatur, executionem Instrumenti Pacis nihil comüne habere cum ordinaria sententiarum executione, cum tamen res transactæ pro Judicatis habeantur. Est! Ordinationem executionis *art. 16. §. 2.* non pertinere ad §. 3. ubi

ubi de petendis & dandis Commissariis Cæsareis ad exquendum agitur, inde tamen nihil novi vel extraordinarii ratione Consilii aulici erueretur, quia ibi hujusmodi Commissarii peti & dari solent. Ex eo, quod speciatim de hoc modo exequendi in Instrumento Pacis cautum sit, malè concluditur, eum prorsus extraordinarium esse. Statim enim idem inverti posset: si modus exequendi per Directores vel Duces Circulorum ordinarius esset, quid opus fuisset, de eo in Instrumento Pacis cavere, & specialia Edicta & Rescripta ad eos emittere? si de executione sententiæ Cameralis sermo hîc esset, locum habere fortè posset surrogatio Circulorum vicinorum, si proximi præterundi essent; At inde non sequitur, quod Directores proximi Circuli executionem irritare possint, quoties Imperator sententiam Consilii aulici alii exequendam, vel Victori ipsi possessionem apprehendendam committit, licet etiam vicinorum Circulorum Directores sileant. Author confundit semper executionem sententiarum aulicarum & Cameralium, unde omnis disputandi materia. Principalem authoris intensionem esse, ut evincat, sub prætextu impugnandi modum procedendi per indirectum ipsam sententiam Imperatoriam subvertere licere, fortè appareret, si sententia pro parte victa excidisset, idemque modus in exequendo adhibitus fuisset, author vix eum impugnandum duceret, neque quisquam eundem impugnari pateretur, si alicui ex Directoribus Circularibus contingeret, ut ipsi executio sententiæ in causa propria, ratione bonorum in alio Circulo sitorum ab Imperatore cum adjunctione Commissarii concederetur.

In monitis tantum modus procedendi carpitur, nihil contra ipsam sententiam prolaturum est. Hîc autem pensculatius æstimandum, an executio mereatur vitiò clandestinatis insigniri, quâ sententia per se justa meliore & faciliore modo effectum sortiri debuisset, sive an sententia justa elusoria reddenda sit, si propter certas causas modò non extraordinariò, sed faciliore executioni mandata sit.

Itaque vitio vertendum non est, si Justitia in exequendo sine dolo cum prudentiæ temperamento habilior reddi curatur. Finis Judiciorum consistit in administratione Justitiæ, modus procedendi suppeditat mediâ. Fine obtentô frustra belligeraretur de mediis, an ritè adhibita sint, cum eorum usus in Consistorio Summi Principis non sit stricti Juris.

Ad Caput XI.

ORditur author à falsa suspitione, & progreditur in supposito satis confutato, quasi Directoribus Circularum facultas exequendi privativè data esset. Cum allegato loco *ex Declar. Pac. publ. de Anno 1522.* conferri debet *art. 31.* ubi singulis etiam Magistratibus executiones committuntur, quamvis Capitanei Circularum constituti sint, additurque expressè: procedendum esse secundum alias etiam Ordinationes præteritas & futuras, non secus, ac si Circuli, eorumque Præfecti non essent constituti.

Disparitas, quam author hic eruere conatur, quasi Commissarius Cæsareus Directores Circularum in exequendo quidem impedire non possit, hi autem ipsi præpedimenta objicere non prohibeantur; cum verbis dictæ Declarationis non convenit, quæ mutuam assistentiam & paritatem inter utrosque sine exceptione injungit, nec alterum cum altero concurrere vult, nisi alter alterum requirat.

Non opus est argumentatione syllogisticâ, ubi rerum testimonia adsunt. Interest Judicis & partium, ut sententia lia quam facillime & sine ambagibus executioni mandetur.

Haud exigua mora metuenda esset, si Circuli inter se prius committendi essent, quibus juxtâ authoris mentem alii vicini fortè dubium movere possent, quis eorum proximior sit.

Ipsi Directores Circuli, qui prætereundi essent, eâdem facilitate reliquis Circulis sese opponere possent, quasi causæ non

sæ non satis prægnantes essent, ut præteriri debuissent : Vicini fortè Circuli viribus non satis instructi essent, aut vererentur vicinis potentioribus vim inferre , etsi quæ alia sunt, quibus sententiæ executio in infinitum protrahi posset, sicut in arbitrio Circulorum esset.

Quod sanè non levius periculum est, quàm si quis aggressionem contra Pacem publicam pateretur , quia hostiliter etiam agit , qui alteri suum injustè detinet. Sic non apparet, cur minùs promptò auxiliò Imperator executionem sententiarum promovere , quàm aliàs vim vi repellere deberet.

Ad Caput XII.

MIrum, quod in dubium revocetur, an articulus V. §. 51. in *Instrum. Pac.* loquatur tantùm de negotiis Imperii, non item de Judicialibus, cum tamen ibi non solum de Deputatis Imperii Ordinariis ad negotia publica, non ad Judicialia destinatis agatur , sed etiam dum in loco allegato ad extraordinarias Commissiones venit, expressè additum sit, intelligi tantùm negotia in Imperio , non autem in Judicio expedienda.

In Comitibus ac in Conventibus Circularibus & Collegialibus sæpiùs occurrunt negotia inter Electores, Principes & Statûs dubia, præsertim in materia contributionum , hospitiationum & his similium, quibus componendis certi Deputati ex Constatibus constituuntur, qui respectu Deputatorum Ordinariorum in novissimo Imperii Recessu §. 194. nominatorum extraordinarii dicuntur, in quibus constituendis paritas religionis utique observanda venit, quia in talibus favor & odium religionis quid operari potest, quod alterius religionis consorti in gravamen cederet. Hoc cessat in merè Judicialibus, ubi Commissarius ab utraque parte in religione æqualiter distat, ob id neuter habet, quod odium vel favorem ob religionem à Commissario præ altero speret, aut metuat.

Non obstat, quod in fine *d. §. 51.* mentio fiat votorum & sententiæ : Nam sententia in intelligenda pro substrata materia, quæ est negotium Imperii, tum etiam observandum est, enunciationem ibi esse adverbativam, Commissariis istis non licere in hujusmodi controversiis per modum sententiæ procedere, quod Ordinibus in Constatibus suis in hujusmodi causis datum non est, quæ hinc ipso à Judicialibus ibi segregantur. Capitulatio potentissimi Regis Josephi non stringeret S. Cæsaream Majestatem, sed nec locus allegatus, qui se refert *ad d. art. V. §. 51.* illud infert, quod author vult.

Ad Caput XIII.

Remittendus hinc est author ad epistolam amici ad amicum, quam legisse videtur, quia non ita crudè, sicut author thesium præsupponit, sententiam alterâ parte planè inauditâ latam fuisse. Postquam autem in eadem & altera epistola amici ad amicum deductum, quicquid ad justificandum processum etiam quoad sententiæ publicationem conducit, nihil iis addendum est.

Author monitorum plura dissertationi imputavit, quàm in ea deprehenduntur, quasi ipsam publicationem sententiæ inter accidentalìa Judicii retulisset.

Contrarium legitur in principio, quod tantum modus promulgandi accidentalibus accenseatur. Author ipse etiam fatetur, in publicando aliquid arbitrio Cæsaris relictum esse.

A publicatione Legum ad promulgationem sententiarum non procedit illatio, quoniam Leges in futurum non modò singulos, sed totam Universitatem per modum præcepti obligant, ut injuriâ afficerentur, qui juxta Leges istas judicarentur, antequam ad notitiâ eorum venerunt. Sententia autem facit Jus inter partes, & quia, quod jam ante Juris erat, pronunciat, publicando simul executioni mandari, & exequendò simul publicari potest, quod de Judiciis supremis in casibus

casibus specialibus intelligendum, ut si sententia in se justa sit, victus propterea se reapse injuriam passum esse queri non possit. Præmissio executorialium utique nec ad sententiæ, nec ad executionis substantialia pertinet, nec semper in Consilio aulico observatur.

Ad Caput XIV.

COrruunt Monita ad hoc caput per ea, quæ in præliminaribus de differentiâ Consilii aulici & Judicii Cameralis dicta sunt.

Dissertatio non vult Consilium aulicum ad impediendas sententiarum Cameralium executiones Commissarium constituere posse, quod Recessui Imperii novissimo contrarium & insolitum esset. Dum Imperator modo exequendi sententias aulicas irrestricto utitur, nihil detrahitur Juribus Circulorum, ut opus habeant, se contra Imperatorem defendere. Sed Circuli hoc ipso jus quæsitum S. Cæs. Majestati noviter in dubium vocarent.

Ad Caput XV.

REcidunt hæc monita in idem cum præcedentibus, nimirum in confusionem sententiarum in Consilio aulico, & in judicio Camerali latarum, & graduum in Executionibus adhibendum. Leges post Ordinationem Cameralem Constantinensem *de Anno 1507.* de modo exequendi agentes, ad sententias Consilii aulici non extendendas esse, in prolegomenis deductum legitur.

Ad Caput XVI.

Idem regeritur monitis ad hoc caput adductis. Nimia est Extensio executionis ab Imperatore, ut Archi-Duce & Principe Imperii impetrandæ, ad Regem Galliæ, tanquam exterum, cui ne qua executio à S. Cæs. Majestate committatur, ridicu-

ridiculus metus est. Circuli ob impotentiam ad exequendum inhabiles, ab Imperatore non privantur facultate exequendi, sed pro tempore eâ ipsimet uti nequeunt. Interim Justitiæ cursus non est retardandus.

Suprà etiam ostensum, argumentationem à majori ad minus procedere affirmativè, si Imperator celeri auxiliò ipse pro pace publicâ conservandâ invasionibus hostilibus occurrere potest, quod idem possit ad exequendum sententias, nam & hoc ad conservandam Pacem publicam pertinet, nec minus periculum propter scandalum subest, si sententiis Imperatoris contumaciter resistitur, quas in vigore suo conservari, publicè interest.

Ad Caput XVII.

Licet respectûs, in Imperatore conjuncti sint, secundum quos seorsim consideratos dissertatio ipsi Jus exequendi ex tot diversis Capitibus asseruit, non tamen idem bis, vel ter, tædiòse repetiit. Respectus hòc capite propositus infrà Imperatoris dignitatem non magis, quàm Officium Directoris vel Ducis infrà dignitatem Principis est. Si tantis Principibus hi tituli non nimis exigui sunt, nec etiam Imperatoriâ Majestate indignum erit, si consideretur, ut supremus omnium Ducum Circularium Imperator (quò nomine & intuitu supremæ Directionis militaris apud Romanos ab initio insignitus fuit) & ut universalis omnium Circularium Directorum Director, ac Belli Pacisq; Executor. Dum autem operationem Imperatoribus aliàs competentem author monitorum ipsi ob executionem pactis limitatam restringere vult, in eundem errorem recidit, quasi ea, quæ Judicium Camerale spectant, etiam Imperatorem quoad Consilium aulicum stringerent, cum tamen ratione sententiarum in hoc Consilio latarum se nunquàm ab executionibus arcuerit, sed ab ea de factò arceretur, si modus exequendi Camerali Judicio præscriptus Consilio aulico noviter

viter obtruderetur , imò quoad missionem in possessionem ea non permitterentur , quæ Judicio Camerali data sunt ; neque Officium dici posset, Directores vel Duces Circularum à Jure quæsito ita arceri, cum tale Jus quæsitum non habeant. *Recess. Imp. de Anno 1555. §. 64.* loquitur in terminis generalibus, quotiescunque militia circularis adhibenda, vel in campum deducenda est. Hic etiam quæstio non tam est de rei judicatæ executione demùm præstandâ, quàm de arte ab Imperatore factâ rursus interversâ, qui casus ad planè insolitos referendus est.

Notari merentur, quæ ad hoc caput in fine leguntur, consuetudinis vim notantia, quibus ea etiam superstructa sunt, quæ dissertatio in medium adduxit, & suprâ in prolegomenis ulterius deducta sunt.

Ad Caput XIIIX. & XIX.

IN utroque capite distinguitur inter elisionem sententiæ & repulsionem executionis : Hanc author Directoribus Circularum contra Imperatorem tribuit, illam longè ab ipsis abesse vult. Sed illa ab hac vix mentaliter separari potest, nam qui vult antecedens, vult etiam consequens.

Ex suprâ dictis autem constat, non tam executionem, de qua agitur, quàm ejus irritationem esse inusitatam, & novationem non ab Imperatore, sed contra ipsius Majestatem inauditò exemplò fieri, nec Circularum, sed ipsius Jura turbari ab illis, quia talia suadent, & propugnare conantur.

Ax Caput XX.

NON negantur Exempla executionum ab Imperatore aliis, quàm Circularum Directoribus vel Ducibus commissarum, sed sub finem *ad cap. 17.* assertum legitur, talia sub Imperatore Ferdinando II. idu

usu venisse. Conceditur etiam, possessionem vacuam privarâ authoritate apprehendere nefas non esse. Dissertatio causam Megapolitanam antiquam & Erfurdensem intactam reliquit, propterea nec his exemplis immorari convenit.

Querelæ contra executionem Civitatis Dona: Werdenfis alii, quàm Directoribus Circuli Svevici commissam potissimum inde derivatæ fuerunt, quod Civitas ob causam religionis in Bannum declarata fuit. Non satisfit rationibus dissertationis, si dicitur, in Instrumento Pacis non omnia speciatim correctâ fuisse, quæ correctione indiguissent. Tanti enim momenti hæc materia executionum fuit, quæ Electores, Principes ac Status non paucos tum contigit, & quotidie eos attingere potest, ut nequaquam cum reliquis levioribus incorrecta transisset, si Imperatori alium exequendi modum proponi placuisset. An ergo Directoribus Circulorum singulatim id licebit, quod tunc ab universo Imperio factum non est? Nam in Instrumentis Pacis nihil de executionibus sententiarum in posterum aliter à S. Cæs. Majestate instituendis continetur: sed *art. 16.* ubi de ipsius pacis executione agitur, Directoribus & Ducibus Circulorum conjuncti sunt etiam Commissarii Cæsarei.

Ad Caput XXI.

Distinctio vis directivæ & compulsivæ non infrequens est in materia executionis, sed cum eadem non conveniunt distinctiones inmonito ad hoc caput notatæ inter executionis comminationem, ejusque realem expeditionem, quia vis directiva non in nudis comminationibus juxta dissertationis mentem subsistat, sed ad reales dictationes pœnarum etiam banni, inhibitiones, arresta, sequestra, missiones in possessionem, assignationes, traditiones, dimissiones & absolutiones Officialium atque subditorum à præstitis Juramentis, per novas Juramentorum exactiones, & his similia se extendat, item
inter

inter executiones literaliter & realiter factas, quia vis directi-
va etiam ad realia se exerit.

Inter hæc recensetur etiam missio in possessionem, in
qua executio sub disputationis incudem vocata potissimum
consistit, quam Judicium etiam Camerale non adhibitis Circu-
lorum Directoribus vel Ducibus cum effectu decernit, ut ex-
pressè habent verba *Ord. Cam. par. 3. tit. 48. §. 13. Et tit. 48. §. 5.* Hæcque potestas ab initio statim Judicio Camerali con-
cessa legitur in *Declar. Pac. publ. de Anno 1500. art. 8.* In dictis
Sanctionibus contumax & condemnatus quidem in Bannum
prius declaratus dicitur, sed idem etiam pro more tunc recepto
ante executionem per Circulorum Directores vel Duces ex-
pediendam contigit juxta *Ord. Cam. par. 3. tit. 48. §. 1. Et 8. Et
tit. 49.* Postquam in *Recess. Imp. de Anno 1654. §. 15.* prævia
ista declaratio in Bannum non amplius necessaria visa fuit; fa-
cultas mittendi Victorem in bona adjudicata Camerali Judi-
cio propterea non sublata, nec statim in Directores Circulo-
rum translata intelligitur.

Victorem tunc possessionem propriis viribus apprehen-
dere, & minus S. Cæs. Majestatem, quam alium quemvis Ma-
gistratum aut personas etiam privatas ad occupandum ipsis
assistere posse, in *Ord. Cam. par. 3. tit. 48. §. 5. Et 9. Et in Declar.
Pac. publ. de Anno 1522. art. 16. 24. 30. Et 31.* sancitum est, nec
requiritur, ut pars victa juxta authoris sententiam in hanc im-
missionem prius consentiat, multo magis dicendum, hanc
facultatem Imperatori quoad sententias aulicas compe-
tere.

Falsè igitur asseritur, Executionem realem aliter, quam per
Circulos fieri nullò modo posse, aut Circulis injuriam tam
gravem inferri, si absque eorum ope Victor in possessionem
mittatur. Nimis dura itaque hæc excidit expressio de hujus-
modi executione Imperatoris autoritate facta, quasi potius
pro collusionem cum Victore habenda esset, quamvis Justitiæ
ipsius sententiæ nihil obijciatur.

Possessorio interim decido & parti victæ regressu in petitorio expressè reservato, non licet videre, quid aliis inde aded metuendum, ne Provinciis suis ejiciantur, quod ab Augustissimo Imperatore unquam factum, aut unquam cogitatum, sine injuria dici nequit, qui potius hanc à se suspicionem hoc ipsò declinaturus, noluit diuturnò sequestrò, aut alias possessionem rei controversæ detineri, cum alterius partis intentio melius fundata visa sit, ut interim juxta tenorem Capitulationis *art.* 39. ne sententia elusoria fieret, victorem ad possessionem & investituram admittendum duxerit.

Omnium potius Principum & Statuum interest, ne sub prolixo executionis sufflamine ditionibus suis diu carere cogantur, neque iniquæ conditiones rædiò litis ipsis extorqueantur, sed perversæ consequentiæ maturè præscindantur.

Cadente executionis irregularitate cadit etiam superstru-
ctæ resistendi licentia.

Ad Caput XXII.

Rationibus hic oppositis plurimis in dissertatione jam tum satisfactum. Quicquid ulterius pro suspendendo effectu sententiæ pendente Judiciò revisoriò in Consilio aulico ratio- cinatur author, tantum robur non habet, quin potius spectandum sit, quid usur observetur.

At constat, in praxi prævalere opinionem, quæ interpo- sitò remediò supplicationis, executiones sententiarum in Con- silio aulico non suspendendas censet. Nec obstat, quod in Ca- pitulatione *art.* 42. non ad Recessum Imperii novissimum, in quo effectus suspensivus revisionibus Cameralibus ademptus est, sed ad Instrumentum Pacis, in quo effectus iste suspensivus ad revisiones sententiarum in Consilio aulico latarum extensus fuit, remissio fiat. Responderi enim potest, ibi in Instrumento Pacis non tantum contineri remedium supplicationis in Con- silio aulico ad exemplum revisorii effectum quoque suspen- sivum habere, sed quod etiam quoad Processum Ordinatio
Judi-

Judicii Cameralis in Consilio aulico per omnia observari debeat. Atqui Ordinationis Cameralis pars facta est sublatio istius effectus suspensivi : ergo remissio facta in Capitulatione ad Instrumentum Pacis, de hac quoque sublatione effectus suspensivi intelligenda est. Quoniam itaque observantia Consilii aulici sententias pendente revisione exequendi non mutata est, cur stare prohiberetur?

Quæ in fine contra hanc observantiam allegantur, non ferunt dissertationem, quia secundum verba authoris, sententiæ ex certis causis suspensæ fuerunt, quod etiam dissertatio extraordinarium fieri posse, non negat. Casus istos tantò magis extraordinarios fuisse, necesse est, quia ne supplicatio quidem in illis formaliter interposita fuisse dicitur.

Opinio ista contraria multos Consiliarios & Advocatos adduxit, ut interpositâ supplicatione executionem sententiæ urgere prætermiserint, quam Consilium aulicum partibus non implorantibus non obtrusit. Ex hac partium negligentia verò novæ observantiæ introductio, aut antiquæ receptio non est nata, nec quidquam præjudicatum Consilio aulico. Author propterea facilius in Consilio aulico remedium suspensivum concedendum esse vult, quia ibi celerius, quam in Judicio Camerali jus dicitur. At propterea ibi æquè, ac in hoc Judicio nihil prætermittitur, quod ad accuratissimam causæ cognitionem necesse est. Sed & partibus in Consilio aulico permittitur, pluribus scriptis, quam in Judicio Camerali causas suas propugnare.

Tarditati Revisionum contra sententias Camerales instituendarum in Recessu Imperii *de Anno 1654.* simul ac effectus suspensivus ipsis rursus ademptus fuit, per Revisiones extraordinarias & annuas præventum legitur, ut æquè celerem exitum, ac supplicationes contra sententias aulicas habere deberent & possent. Quod autem Revisiones istæ extraordinariæ tantam dilationem hætenus passæ sint, id ex accidente contingit, neque tamen eò usque extendendum est, ut propterea

inter Revisiones Consilii Imperialis aulici & Judicii Cameralis quod effectum suspensivum differentiam servari oporteat. Si Electores Principes & Status hoc desiderassent, postquam in Consilio Imperiali aulico sententias, non obstante supplicatione interposita, regulariter executioni mandari solere noverunt, id sine dubio clavis verbis in capitulationibus, maxime in formula perpetuæ exprimi curassent, quod intermiserunt inevidens indicium, istam Consilii aulici praxin non interruptam, nec Circulorum Directoribus commissum fuisse ut S. Cæsar. Majest. óbices ponerent, quoties huic consuetudini insistendum censet.

Ad Caput XXIII.

Contra sententias in possessorio latas non facile locum invenit Restitutio in integrum, & nisi à minore vel aliàs impeditò petatur, facile dignosci potest, an calumniosè, an ex legitimis causis petatur. Nec verò Dissertatio Restitutioni in integrum suspensionem executionis simpliciter & in universum denegat. Ex *Recess. Imp. de Anno 1532. art. 3. §. 17.* Illud hîc amplius addendum, ne quidem remedium Syndicatus executionem sententiæ in Camera Imperiali suspendere.

Ad Caput XXIV.

Dissertatio non negat pendente revisione, si executio fiat, cautionem necessariam esse, sed illud tantum vult, sub disputationibus de cautionis sufficientia executionem non esse impediendam, si victor sit Elector, Princeps, aut alius Imperii Status, bonis abundè instructus, quorum cautiones simpliciter arbitrio Judicis definiendæ in *Recess. Imp. de Anno 1654. §. 124.* submittuntur. Verba, quæ urgentur in monito, alias partes litigantes subintelligunt.

Ad Caput XXV.

Bina penè secula elapsa sunt, ex quibus modus exequendi sententias Consilii aulici post institutum Judicium Camerale per Commissarios Cæsareos obtinuit, & post novissimum *Recess. Imp. per 44. Annos* continuatus stetit, ut intercedente tempore aliud introduci potuisset, si Directores Circulorum S. Cæs. Majestati, aliis vé Electoribus, Principibus & Statibus id persuadere potuissent.

Si autem res ad Comitìa pertineret, non videretur, quâ ratione singulis Circulis eorumque Directoribus interim id tribui posset, ut receptum Consilii aulici modum procedendi & exequendi vi interrompendum sibi sumerent.

Non adesse sufficientes rationes, videtur, ut causa petitorii pro desperata habenda sit, ad quam alludit, neque enim ex parte Religiosissimi & Justissimi Imperatoris in administranda Justitia ulla mora metuenda est, neque dilatio ex parte Victoris præsumi potest, cum sententiam sub conditione solita, nisi quid novi ab altera parte proferatur, in petitorio ipsum ferri petiisse constet; latet contrà, quò in modo exequendi peccatum sit, ubi pars victrix sine vi in possessionem juxta sententiam missa est. S. Cæsarea Majestas pendente lite non adhibitis Circuli Directoribus regimen interim in parte Gustraviensi provisionaliter instituit, quod à Directoribus agnitum fuit. Cum itaque nihil tam naturale sit, quàm unumquodque eodem modò, quò colligatum est, rursus dissolvi: S. Cæsarea Majestati nihil etiam obstitit, quò minus illud ipsum regimen interimisticum suâ autoritate absq; Directoribus Circuli institutum, etiam absque eorum adhibitione iterum tollere, idque ei committere potuerit, cui possessio interim pendente petitorio adjudicata fuit.

Appellandi licentia in fine data non erit intelligenda de Imperatore ad Directores Circulorum. Sed si fingeretur, par-

tem per sententiam, vel in modo exequendi gravatam esse, certè alia Legibus & moribus ordinata remedia supersunt, quàm ut ad viam facti convolandum sit.

In Receptis. Imp. novissimò §. 165. expressè prohibitum est, parti, quæ se gravatam reputat, causas aliò trahere, quàm quò juxta Ordinationes deferendæ sunt. Nec etiam remissio ad Comitìa locum habet, nisi ubi Consiliarii vel Assesores diversarum religionum in partes abeunt, ubi de interpretatione & intellectu Constitutionum Imperii agitur, ut habet *Instrum. Pac. art. 5. §. 56*. Inter remedia legitima succursus Directorum Circularium nullibi refertur, sed illorum auxilia armata, quamvis sub prætextu defendendorum Jurium Circularium fieri dicantur, cùm talia non existant, principaliter tamen ad reformandam impediendamque sententiam, quamvis per indirectum tendere censebuntur.

Ad Caput XXVI.

Aliud est, rem ad Comitìa deferre, eamque in Circulò præviâ deliberatione præparare, quod ab universis Circuli Membris non à solis Directoribus, nec in causis Judicialibus fit, aliud est, auctoritatem Imperatoris & conclusa Ordinum prævertere; aliud est, Legum præscripta urgere; aliud ea extendere, & consuetudinibus receptis vi resistere, quâ anomaliâ rem publicam turbari, necesse est.

Ad Caput XXVII.

Tantum abest, ut Invicissimus Imperator Electores, Principes & Status servili jugò constringere, aut cæcò quòdam obsequiò fascinare intendat, ut potius ipsius candorè, Clementiam, pietatem & æquitatem quovis Elogiò majorem in omnibus actionibus ejus prædominari per totum terrarum Orbem constet; hinc tantò magis mirandum, quod author monito-

rum